



JUDICIAL SYSTEM MONITORING PROGRAMME
PROGRAMA MONITORIZASAUN BA SISTEMA JUDISIÁRIU

Komunikadu Imprensa
2 Marsu 2016

Ezenorasaun Xefe Estado Maiór F-FDTL Lere Anan Timur: Konfuzaun iha konstitusionalidade iha asaun ne'e

Prezidente Repúblika, Taur Matan Ruak rekuza proposta Governu nian hodi renova mandatu Xefe Estado Maiór F-FDTL, Maiór Jenerál Lere Anan Timur. Nune'e, Prezidente hakotu mesak hodi ezenora tiha Maiór Jenerál Lere no nomeia Adjuntu Xefe Estado Maiór F-FDTL, Brigadeiru Jenerál Filomeno Paixão de Jesus ba promosaun. Iha konfuzaun kona-ba konstitusionalidade ba asaun ne'e, partikularmente kona-ba se Prezidente bele ka lae rekuza proposta Governu nian.

Maiór Jeneral ninia mandatu nu'udar Xefe Estado Maiór F-FDTL termina ona iha 6 Outubru 2015. Iha 27 Outubru 2015, Prezidente simu proposta ida hosi Governu atu renova Lere ba tinan haat tan. Prezidente rekuza proposta ne'e tanba defaktu katak Lere tama ona tinan 60 reforma nian, no husu proposta alternativu hosi Governu. Governu nafatin mai ho proposta hanesan dalara tan atu renova Maiór Jeneral Lere ba pozisaun Xefi Estado Maiór F-FDTL. Prezidente kontinua rekuza proposta hirak ne'e ho fundamentu hanesan, nune'e Prezidente hakotu mesak hodi nomeia Adjuntu Xefe Estado Maiór F-FDTL, Brigadieru Jeneral Filomeno Paixão de Jesus, ba promosaun pozisaun Xefe Estado Maiór. Governu no Parlamentu Nasional rezeita proposta ne'e, no dehan katak Prezidente la iha Póder tuir Konstituisaun atu nomeia Xefe Estado Maiór F-FDTL.

“JSMP husu ba parte hotu atu rezolve asuntu ne'e lalais no ho kalma, nune'e Prezidente, Parlamentu Nasionál, Governu no F-FDTL bele kontribui fokus ba sira nia papél importante sira hodi reprezenta no proteje povu Timor-Leste. JSMP mós husu atu parte hotu respeita Konstituisaun no lei sira iha Timor-Leste, dehan Diretór Ezekutivu JSMP, Luis de Oliveira Sampaio.”

Artigu 86 Konstituisaun fó ba Prezidente podér nomeasaun lubuk ida. Artigu 86(m) prevee katak: ‘Prezidente da Repúblika iha kompeténsia, kona-ba órgaun sira seluk, atu nomeia no ezonera, tuir Governu nia proposta, Forsa Armada sira nia Estado-Maiór Jenerál nia Xefe’. Versaun Portugés Konstituisaun dehan katak Prezidente tenke nomeia ka ezonora Xefe Estado Maiór F-FDTL ‘*sob proposta do Governo*’. Lei sira seluk reproduz artigu ne'e (haree Dekretu-Lei Nu. 15/2006 kona-ba Estatutu Organika F-FDTL (Artigu 8(2), Dekretu-Lei Nu. 7/2014 kona-ba Estatutu Militar F-FDTL (Artigu 74), no Lei Nu 3/2010 kona-ba defeza nasional (Artigu 14(1)(e)).

Hosi fraze Konstituisaun no lei hirak ne'e hatudu katak nomeasaun hosi Prezidente tenke tuir proposta hosi Governu no Prezidente la iha póder atu nomeia ema ruma. Ida-ne'e mós bele haree hosi analiza ba póder sira seluk ne'ebé fó ba Prezidente tuir Konstituisaun. Partikularmente, Artigu 86 (h) fó póder ba Prezidente atu nomeia, emposa no ezonera Governu nia membru sira '*sob proposta do Governo*', no Artigu 87(a) fó podér ba Prezidente atu deklara funu '*sob proposta do Governo*'. Ida-ne'e klaru katak Konstituisaun rekere Prezidente atu tuir konsellu ba asuntu importante sira, no la halo desizaun mesak.

Mesmu nune'e, ida-ne'e haree ba hanesan Prezidente iha razaun legál válidu atu rekuza proposta ba kandidatu hosi Governu nian, Maiór Jeneral Lere ne'ebé nia idade liu ona idade másimu reforma hosi F-FDTL. Tuir Artigu 195(1) hosi Dekretu-Lei Nu. 7/2014 tinan masímu ba reforma mak idade 60. JSMP mós observa katak Prezidente nia nomeasaun ba Xefe Estadu Maiór F-FDTL, Brigadieru Filomeno Paixão de Jesus ne'ebé ho tinan 64 no nia mós liu ona ba idade reforma nian.

JSMP husu ba asesór legál sira hosi Gabinete Prezidénsia Repúblika no Governu atu tur hamutuk hodi identifika opsaun no solusaun legál alternativa kona-ba kestaun ne'e. JSMP hanoin katak se la iha ofisial apropiadu ruma iha tinan 60 mai kraik atu asumi papél lideransa iha F-FDTL, ida-ne'e katak nesesiáriu duni atu altera lei hodi aumenta idade ba reforma ba membru F-FDTL sira. Lei relevante ne'e bazia ba sistema Portugés nian, ne'ebé iha ofisial ho esperiénsia nível aas barak. Mezmu nune'e, antes Timor-Leste bele hari'i ofisiál militar to'o nivel hirak ne'e, nivel idade ba ida-ne'e tenke aumenta.

JSMP kumpriende katak asuntu ne'e agora dadaun lori ona ba Tribunál Rekursu. JSMP husu ba parte hotu-hotu atu respeitu autóridade Tribunál Rekursu hodi halo desizaun ida-ne'ebé independente kona-ba kestaun konstitusionalidade. JSMP husu liutan, atu husik Tribunál halo desizaun ida ne'ebé Independente bazeia ba konsiderasaun legál oioin. Wainhira Tribunál Rekursu halo ona desizaun ba kestaun ne'e, husu ba órgaun estadu hotu-hotu atu respeitu desizaun ne'e. Ne'e krusiál katak orgaun estadu hotu-hotu kontinua hala'o nia knaar iha podér sira ne'ebé Konstituisaun fó, no lideransa sira hosi F-FDTL nomeadu tuir prosesu legál ne'ebé loos.

Atu hetan informasaun liutan bele kontaktu

Luis de Oliveira Sampaio
Diretór Ezekutivu JSMP
E-mail: luis@jsmp.minihub.org